

書



中州丙集第三

劉龍山仲尹 二十八首

劉記室迎 七十六首



許內翰安仁 六首

承旨党公 六十四首

黃華王庭筠 二十八首

禮部趙閑閑秉文 六十三首

劉龍山仲尹

仲尹字致君蓋州人後遷沃州正隆二年進士以潞州節度副使召為都水監承卒致君家世豪侈而能折節讀書詩樂府俱有蘊藉有龍山集嘗於其外孫欽叔處見之叅涪翁而得法者也

墨梅 一十首

瘦損昭陽鏡裏春漢家公主奉烏孫淚痕滴盡穹廬月



誰道神香解返魂絕纓人醉燭花殘主意方濃未厭歡  
十五瓊兒梳洗薄琵琶才許近簾彈生憎施粉與施朱  
換骨玄都亦自姝踈影冷香題不到夢驚煙雨暗西湖  
趙郎愛香人不知羅浮山下有佳期春寒徹骨角聲起  
才記參橫月墮時君王鳳駕九龍池後輦傳呼召雪兒  
狼藉玉臺銀燭暗丁香小麝印宮眉鍾鼓沉沉度苑墻  
玉繩初直殿東廟荀妃早發鷄鳴埭殘月微分燭下粧  
衡州何處問花光抹月批風只欠香安得江南斷腸句  
為題風雨浣啼粧高髻長娥滿漢宮君王圖玉按春風  
龍沙萬里王家女不著黃金買畫工古綃誰藏謝女真  
天寒翠袖一招魂江山嫁盡風流夢雪蒲冰溪月掛村

妙畫工意不工俗老子見畫只尋香未應塗抹相欺得  
政自不為時世粧

自理

日日南軒學壽魚隱中獨愛隱於書兒癡婦笑謀生拙  
不道從來與世踈

西溪牡丹

為雲為雨定成虛醉臉籠嬌試粉初舉國春風避姚魏  
換胎天質到黃徐百年金谷憑欄袖三月揚州載酒車  
我欲禪居淨餘習湖灘枕石看游魚

秋畫

利祿蝸涎壁年華蟻夢槐秋隨庭樹老寒逐鴈聲來卷



性論三適分愁詠七哀閉門人客少書籍逸床進

晚陰

歲滂饒秋雨雲寒結暝陰晚芳留凍蝶疎木立飢禽關  
覺交游減衰從老病尋安眠恐微俸底用說初心

冬日

刀騷短髮鑷還生鏡裏形骸只自驚睡枕食槃罷歲月  
頭風股痺識陰晴鳩棲任笑謀生拙免簡難忘照眼清  
不用煖爐公庫酒試容擁被聽鷄聲

寒夜

漏聲穿竹夜霜清儘看功夫伴短檠睡足梅花半梢月  
虛徐老臯學香生

秋日東齋

一區寂寞子雲家便腹那能貯五車筋力只今如老鶴  
筆頭新愛縮秋虵樹間風定葉漫徑籬外雨寒梅着花  
勝日一樽能笑客更須官鼓候晨樞

窗外梅蕾 二首

玉兒秀穉雲幄藏臯觀已覺鉗水香過眼空花均一寓  
十分春色屬秋堂細蕾初看柳麥肥春風得得逸窓扉  
道人方作玉溪夢石塢竹橋風雪飛

初秋夜涼

小蟲機杼月西廂風雨總分半枕涼白髮自踈河漢象  
一瓶秋水玉簪香



謝孔遵席後堂畫山水圖 後堂號秀隱君

家在龍沙弱水東  
竭來塵世笑春風  
都將天外蓬壺景  
漏作人間畫手工  
玉腕雪迴犀管細  
寶煤香散鳳綃空  
只應大地山河影  
常記飛鸞下月中

別墅二首

墻根雨大土花碧  
秋筍寒添一兩莖  
愛買僻書人笑古  
痛憎俗事自知清  
黃花催織鈿鈿出  
白髮欺人故故生  
饘粥年來吾稍具  
厭隨鞍馬逐浮名  
風雨驅寒入弊裘  
閑齋氣味冷颼颼  
年華過眼驚飛鳥  
利祿催人窘督郵  
竈下旋添溫坑火  
床頭剩買讀書油  
可人誰似黃夫子  
着意裁詩寄四休

龍德宮

碧棋朱甍面面開  
翠雲稠疊鎖崔嵬  
連昌庭檻渾栽竹  
卷盡溪山半是梅  
藻井香銷塵化網  
銅欄秋澁雨留苔  
只應千古華清月  
狼藉春風媿露臺

醑醑

相看絕是好交交  
着眼江梅季孟中海窟  
笙簫來鶴背  
月林冰雪繞春風  
蒲前玉蘂名尤重  
特地梨花夢不同  
安得涪翁香一瓣  
種成聊供小南豐

夏日

床頭書冊聚麻沙  
病起經旬不煮茶  
更為炎蒸設方略  
細烹山蜜破松花



不出

好詩讀罷倚團蒲唧唧銅針沸地爐天氣稍寒吾不出  
攬榆分坐與狸奴

一室

老來湖海媿陳登只有頭鬢未是僧坐對黃昏鍾鼓定  
竹根吹火上吟燈欽叔所傳少時豪氣愛陳登老去真成有髮僧

劉記室迎

迎字無黨東萊人初以廢試部掾大定十三年用薦書  
對策為當時第一明年登進士弟除幽王府記室改太  
子司經顯宗特親重之二十年從駕涼陁以疾卒章宗  
即位錄舊學之勞賜其子國樞進士弟無黨自號無諱

居士有詩文樂府號山林長語詔國學刊行

淮安行

淮安城壁空樓櫓風雨半摧雞糞土傳聞兵火數年前  
西觀竹間藏乳虎迄今井邑猶荒涼居民生資惟推場  
馬軍步軍自來往南客北客相經商迺來戶口雖增出  
主戶中間十無一里閭風俗樂過從學得南人煮茶喫  
青衫從事今白頭一官乃得西南陬宦游未免簡書畏  
歸去更懷門戶憂世緣老矣百不好落筆尚能哦楚調  
從今買酒樂昇平爛醉歌呼客神廟

修城行

淮安城郭真虛設父老年前向予說築時但用雞糞土



風雨即摧乾更裂祇今高低如堵墻舉頭四野青茫茫  
不知地勢實衝要東連鄂渚西襄陽誰能一勞謀永逸  
四壁依前護塼石免令三歲二歲間費盡千人萬人力

唐州後竟  
用此策也

### 河防行

南州一雨六十日所至川源皆泛溢黃河適及秋水時  
夜來決破陳河堤河神憑陵雨師借晚未及晴昏復下  
傳聞一百五十村蕩盡田園及廬舍我聞禹時播河為  
九河一河既滿還之他川平地迥勢隨弱安流是以無  
驚波祇今茫茫餘故迹未易區區議疏闢三山橋壞勢  
益南所過泥沙若山積大梁今世為陪京財賦百萬資

甲兵高談泥古不須爾且要築堤三百里鄭為頭汴為  
尾准備他時漲河水

普照旃檀像舊物也方丈老人比以見還作

### 詩謝之

我昔游京師稽首禮瑞像堂堂紫金身示現大法藏裝  
嚴七寶九重疊九霞帳光如百千日晃耀不容望想初  
法王子運力攝諸匠瓌材發神秘妙斲出智創風流蜀  
居士翰墨老彌壯雷霆大地底音樂諸天上猶疑三十  
二不具梵音相不知一點真正勝千語浪鳴呼五因緣  
語綺反成謗我今獨何幸相見問無恙文殊本無二何  
處覓真妄庶修香火供獲脫煩惱障天龍想驚喜訶衛



日歸向已覺海潮音人天會方丈

梁忠信平遠山水

憶昔西游大梁苑玉堂門閉花陰晚壁間曾見郭熙畫  
江南秋山小平遠別來南北今十年塵埃極目不見山  
烏靴席帽動千里只慣馬蹄車轍聞明窓短幅未何處  
亂點依稀沈寒具煥然神明頓還我似向白玉堂中住  
濛濛煙靄樹老蒼上方樓閣山夕陽一千頃碧照秋色  
三十六峯凝曉光懸崖高居誰氏宅縹緲危欄蔭青樾  
定知枕石高卧人常笑騎驢遠遊客當時畫史安定梁  
想見泉石成膏肓獨將妙意寄毫楮我愧雨立隨諸郎  
此行真成幾州錯區區世路風波惡還家特作發願文

伴我山中老猿鶴

連日雪惡用聚星堂雪詩韻

朔風朝來放雲葉紛紛吹落龍沙雪山河大地同一如  
變化須臾亦奇絕參天松頂老猶強搶地竹頭低欲折  
亂飄書帙愛窓明狂入地爐驚火滅重衾方擁膚尚粟  
凍筆將書肘先掣未容衰白點鬢華只許醉紅生面頰  
何人清唱隨飛塵有客高吟霏鋸屑昔賢句法今尚在  
斷臂阿誰心地瞥後生曠世安敢望故事歷劫徒能說  
是中聖處公會無一粒靈丹工點鐵

徐夢弼以詩求蘆菴輒次來韻

昔聞趙州老老大猶泛愛說法利人天機緣不勝在當



年鎮府話蓋以小喻大具眼領略之於茲豈無待嗚呼  
後來者見趣遠不遠又聞東坡公謫居飽鮭菜暮年海  
南住几席溪山對自饌一杯羹老狂猶故態寂喜霜露  
秋味出雞豚外乃知作詩本口腹不無賴風流二大士  
妙處無向背在家與出家相投若針芥先生今復然秀  
句筆端快誰云修法供遊戲出狼狽一飽待明年桑麻  
歌佩佩

再次前韻

神農嘗草木濟世以仁愛根源列郡出品目成書載中  
云萊菔根試驗頗為大昌谷嘔時須文園渴嘗待食異  
地黃并効與蕪菁遠豈惟藍衆藥政自冠諸菜五州風

土宜罽布畦壟對墾鋤盡農力封培窮百態翠角春雨  
中黃花晚煙外日送盤筋資歲給餅罌賴片玉出頭顱  
層冰起膚背脆美掩蓴菜甘辛敵薑芥物生貴有用對  
此一何快儲貯得沉涵存遺免狼狽但足齊人食何慚  
楚臣佩

鰻魚

君不見二牢山下獅子峯海波萬里家魚龍金鷄一唱  
火輪出曉色下瞰扶桑宮榭林葉老霜風急雪浪如山  
半空立具闕軒騰水伯居瓊瑰噴萍蛟人泣長鏡白柄  
光芒寒一蒿去橫煙霧間峯巒百疊破螺甲宮室四面  
開壕山碎身粉骨成何事口腹之珍乃吾宗郡曹受賞



雖一言國史收，豈非罪鎬藍。一一十里來，百金一笑。  
收叢材，色新欲透瑪瑙，味勝可浥葡萄。醅飲客醉，頰  
浮春紅，金盤旋覺放著空。齒牙寒光漱明月，宵臆秀氣  
噴長虹。平生浪說江瑤柱，大爵從今不論數。我老安能  
汗漫遊，買舡欲訪漁郎去。

樓前曲

樓前山色秋橫碧，樓下水光秋漫白。眼看對此千里愁，  
樓下長歌古離別。蕭蕭郎馬何時歸，鴈奴去作斜行飛。  
灞橋過客夕陽遠，渭城行人朝雨微。玉婁花冷令人瘦，  
日暮倚樓雙翠袖。蕙炷猶殘鷓鴣香，麴塵半著鴛鴦繡。  
五雲飛過芙蓉城，洞天冷落雲間笙。妾身有願化春草，

伴君長亭仍短亭。

題十眉圖

寶箱拂塵金鈕鉞，周昉丹青見真筆。春風曾憶賦妖嬈，  
人共畫圖成十一。燭奴香底花光凝，錚錚鐵響聞三更。  
車聲雷動不通語，眼態波橫空送情。蠻雲盤鶴遼天闊，  
犀玉依依對書札。人生何處不相逢，還醉武陵溪上月。

雲中君圖

衣若新沐蘭湯薰，靈巫拜舞方迎神。恍然相見帝者服，  
九歌昔詠雲中君。畫史亦可人，妙入造化域。羽衣玉塵  
羨且閑，此意不知何處得。空明倏忽紛溟濛，胡為眷眷  
臨壽宮。飄然來下復遠舉，想像央去隨飛龍。祠空人散



秋蕭瑟落日猿聲喚秋色湘天極目青茫茫憑高一望  
無南北

楚山清曉圖

山娟娟江茫茫綠山林木老已蒼穿林細路縈羊腸汀  
洲人家蘭杜香兩山秀出江中央宛如雙劍森鋒鋌層  
巒架空化寶坊塔波突兀一氣傍雞聲喔喔林鳥翔願  
瞻曙色開東方清風宿霧方蒼涼兜羅綿網淡平野紫  
磨金餅瞰浮桑櫓聲才動欲離岸鍾韻已殘猶殷床當  
年有米維楚狂生子亦復肖阿章想從乃翁住朝陽收  
拾山綠餐湖光膝前翰墨觀淋浪此圖戲出遂擅場彼  
衆史者何敢當不然安得牙籤犀軸古錦囊賞覽一朝

蒙古皇

題劉德文戲絲堂

郵傳文書日傍午過眼不容留頃許先生遣決談笑間  
退食歸來奉慈母吾不愛錦衣榮歸誇梓里吾不愛繡  
衮徒步登槐府傳家所愛作寧馨入室不愁無阿堵堂  
中怡愉奉顏色堂下嬉戲同兒女十分壽竿泛醇酎五  
色綵衣紛雜組映堦萱草弄春色循陔蘭葉榮朝雨先  
生蘊藉古人似早歲聲名天尺五拘縻豈合坐兀曹戲  
納真宜趨禁所更書屈指今幾日好看褒詔傳天語龍  
光歆艷動庭闈湯沐疏封分郡土芝封鈿軸爛雲錦羽  
衣寶帳輝金縷形容何止入畫圖歌詠亦須流樂譜區



區賤子獨何幸晚喜宗盟同鼻祖他年一笑約升堂萬石尊前拜嚴姥

送劉德正

騏驎蟻垤空莫干犀革斷人材必超軼物理乃駟半先生廊廟具冰雪自湔盥十年處繁劇風力濟詳練堂堂八面敵了了一笑粲雲中國西邑食貨資輓轉中臺輟之去正倚咄嗟辦從容九年蓄坐想出鞭箠向來盜鐵使緒業著家傳春朝觀上計廣厦奉間燕行矣需詔除鵝行葺榮觀

盤山招隱圖

溪山不難買所費千金儲不如數峯雲朝昏對吾廬交

游豈無人轉眄傷離居不如吾兄弟相應如笙竽左僕  
藟名族温温器璫璣身雖市朝寄心與功名踈伯也亦  
可人文華炳於菟風神聳魁偉襟韻含冲虛平生一片  
心綠塵不關渠相期有幽事歲晚山林俱綵服照黃冠  
歡呼奉親輿大婦侍巾帨中婦供庖厨諸孫戲膝前翩  
然鳳將雛朝采南澗芹暮瀝西溪魚煙霞入杖履風月  
來窓疏觀竹上巢雲禮佛登香爐紅龍雪浪湧白塔蒼  
煙孤水絃寫天籟茶甌泛雲腴快哉天下樂俯仰餘何  
須正恐老太冲招隱肯所無

寄題禹城孫氏茂德亭

濟南孫夫子養素抱絕識家有五畝園種樹如種德枝



葉深覆護根本飽封殖要令方寸地不著荆與棘流芳  
被鄰里餘蔭連阡陌居然物隨化草木盡佳色河陽藝  
桃李壽張時梓漆至今青史上相望如黑白乃知百年  
用賴此一日積君今尚隱約白首勤墾闢人心亦天理  
否泰有終極會待東風來吹春蒲花國

郭熙秋山平遠用東坡韻

槐花忙過舉子閑舊游憶在夷門山玉堂曾見郭熙畫  
拂拭練素塵埃間楚天極目江天遠楓林渡頭秋思晚  
煙中一葉認扁舟雨外數峯橫翠巘淮安客宦踰三霜  
雲夢澤連襄漢嗚平生獨不見寫本慣飲山綠食湖光  
老來思歸真日日夢想林泉對華髮丹青安得此一流

盡我橫筇水中石

南口

危峯張屏幃峻壁開戶牖崩騰來陣馬翔舞下靈鷲秀  
色紛後前晴嵐迷左右重陰忽障翳虛籟競呼吼深迂  
愛風日高亢捫星斗帝居望北闕村落當南口軍都漢時  
縣遺跡奄存否中郎讀書處遺構想催朽誰云用武地  
經訓乃淵藪我家膠東湄樸學嘆白首居鄰通德里况  
此見師友慙無書帶草采采為盈手何以醉先生清溪  
綠如酒

晚到八達嶺下達旦乃上

車馬兩山間上下數百里繁紆來不斷奕奕似流水鯨



形曲腰膂蛇勢長首尾我車從其間搖兀如病瘞推前  
挽復後進寸退還咫尺息心固安分尚氣或被指徐趨自  
循轍躁進應覆軌行行非我令杞亦豈吾使倦僕困號  
瘁疲牛苦鞭箠紕如五更鼓相慶得戾止歸來幸無恙  
喘汗正如洗何以慰此勞村醅正浮蟻

出八達嶺

山險略已出彌望盡荒坡風土日已殊氣象微沙陀我  
老倦行役驅車此經過時節春已夏土寒地無禾行路  
不肯留奈此居人何作詩無佳語以代勞者歌

隰川

隰川來西州數郡被其利刺陵放而南奔駛不可制茲

馬幸不幸長策未容議且復觀其瀾雄豪快人意

上谷

磨笄聳然來隰水洶而去山川俯城郭藩翰重畿輔桑  
麻數百里煙火幾萬戶長橋龍偃蹇飛閣鳳騰翥傳聞  
山西地出入此其路源源百貨積井井三壤賦葡萄秋  
倒架朽藥春蒲樹盤躡多布膏嬋娟半城素未懷小靖  
節厚德皆忠恕至今受一廬如昔歌五袴傷心隔生死  
知已今有數歸日當驅車生芻奠其墓

蔡有鄰碑

我為山西行叱馭過近縣傳聞蔡有鄰石刻古今冠風  
流書以來妙絕隸之變銀鈎鸞鳳舞鐵畫蛟龍纏馮誰



致墨本故舊詫珍獻正恐賦分薄一夕碎雷電平生六一老集古藏千卷惜此方殊鄰公乎未之見

車輶輶

馬虺隤牛齷齪山行縈紆車輶輶路傍指點是官人老矣一翁雙鬢禿汝牛辛可耕汝馬辛可騎有此可載琴書歸胡為奔走東西道白髮刀騷被人笑

沙漫漫

沙漫漫草班班南山北山相對着我行乃在山之間行人仰不見飛鳥樹木足知邊塞少沙漫漫草班班我行欲赴西風還僕夫汝莫愁衣單我但着衣忌汝寒

摧車行

渾河洶湧從西來黃流正觸山之崖山崖路窄僅容過小誤徃徃車輪摧車摧料理動半日後人欲過何艱澁深山日暮人已稀食物有錢無處覓何時真宰遣六丁鏟此疊嶂如掌平憧憧車馬山西路萬古行人易來去

敗車行

前車行後車逐車聲夜隨山詰曲前車失手落高崖車輪直下聲如雷同行急救救不得人牛翻壓鳴聲哀我時潛聞後車說前車使牛何太拙只知拍手笑前人不道後來當改轍前途猶有坡陀在後車當以前車戒

數日冗甚懷抱作惡作詩自遣

生涯吾亦愛吾廬踏地從來出賦租曾次有懷空魂磊



人間無處不崎嶇扶搖安得三千里應見真成百億軀  
直欲棄家參學去一龕香火供齋盂

寄題安崑起官舍北濱

一軒高占鳳麟洲要作人間汗漫遊海國風煙自朝暮洞  
天日月幾春秋夢魂欲拂三花樹活計聊隨一葉舟待  
我丹成訪君去閨風佳處卜菟裘

莫州道中

風林葉葉墮霜紅天未晴客一鏡空野曠微聞鳥鳥樂  
草寒時見馬牛風人生險阻艱難裏世事悲歌感騷中  
白髮孀親倚門處夢魂千里付歸鴻

上施內翰

十年不見達安公草木依然臭味同賴有酒尊煩北海  
可無香瓣禮南豐天堦禮樂三千字海國鴟鵬九萬風  
正以高軒肯相過免教書客感秋蓬

題吳彥高詩集後

片雲蹤迹任飄然南北東西共一天萬里山川悲故國  
十年風雪老窮邊名高驥北無全馬詩到西江別是禪  
頗憶米家書畫否夢魂應逐過江舡

代王簿上梁孟容副公

妙年掾筆賦長揚一日聲名滿四方天上風流青瑣客  
人間嘉慶綠衣郎錦囊看讀金花誥畫戟閑凝燕寢香  
預恐政成趨急詔海沂無計駐王祥自笑微官馬骨高



十年霜鬢雪才驩長林豐草未適性火帽短靴安得豪  
名宦真同一雞肋簿書空束兩牛腰故園清興湖山裏  
歸去經營一把茅

清明前十日作

雨餘天氣動朝寒寒食都來數日間羯鼓催開小桃李  
畫幃圍出好溪山塵埃老我真堪笑風物撩人欲破慳  
梅雪已殘春過半一尊何處與公閑

閏立文晚集慶壽作詩戲之

桃李欲開風雨多花時猶得屢經過緩聽一曲玉連環  
蒲泛十分金卷荷紅燭影紗闥喚馬翠羅承鞞見凌波  
杜陵老矣孤春事奈此詩愁惱亂何

明日復會客普照繼呈此詩去及瓜不數日矣

室中呼起散花天來伴維摩到處禪百刻篆香消晝永  
一番花雨破春妍雲山真欲追聲叟風腋何妨借玉川  
他日想思共明月舊萍應說禁煙前

觀古作者梅詩戲成一章

翠袖佳人脩竹傍風姿綽約破湖光靜中慣識形神影  
妙處誰知色味香觀想有靈通水月孤音無侶伴冰霜  
故人愁絕今何許煙雨霏霏子半黃

秋郊馬上

故壠松楸暗空城草棘荒數峯橫鳥道一徑繞羊腸  
葉露仍沃稻花風已香兒時十年夢懷舊一悲涼



海色樓臺市山容水墨圖風疎水揚柳煙瘦石蒼蒲歲  
熟多同社村閑絕詎租平生亦何事塵土眷吾廬

贈人

何必羅浮訪稚川相逢一笑共談玄蓬萊咫尺三萬里  
銅狄日循五百年夢幻莫論身外事蕭歌聊得醉中天  
幾時丹竈同收拾去入雲山了舊緣

別後有懷元濟

聞說風流靖長官宦游寥落廢清閑酒狂吞盡豕三尺  
詩瘦聳成肩兩山世事君方厭蝸角生涯我欲賦魚蠻  
脫身何日扁舟去相對一簑煙雨間

贈董丞秉國

迫窄十年冠蓋場誰憐王謝有諸郎俗緣不脫三生債  
豪氣都無萬丈長遣興久憑詩作社避愁專欲酒為鄉  
黃塵投老逢青眼賴有知音未可忘

聞彥美服藥以詩問訊

耳邊塵事耳無喧聽我歸耕郭外村賤子自藏蝸殼舍  
故人誰並雀羅門書窻共作三年計尊酒相逢一笑溫  
不信家山不堪隱仇池今在古銅盆

和人七夕韻

今古良宵此會同望窮雲物有無中間鈿合三山隔  
天上靈槎一水通鳩鵲樓空紈扇月鴛鴦機冷學羅風  
不須更乞蛛絲巧久矣人生百巧窮



海上

潮蹙三山島煙橫萬里沙  
蜃樓春作市鼙鼓暮催衙  
一曲水仙操片帆漁父家  
安期定何處試問東如瓜

次曹次仲韻以自感

自笑區區學道難未容香火訪名山  
日循憂患餘生裏收斂光芒窘步間  
白社祝公今日始丹丘容我幾時還  
相從願結翻經會共過壺中日月閑

寒食阻雨招元功會話

滿城風雨致餘春燕坐翛然亦可人  
楊柳杏花相對晚石泉槐火一時新  
愁邊興味渾宜酒句裏機緣欲脫塵  
早晚阿咸來過我坐中軟語慰情親

次韻諸園不暇游覽

故人家有小池臺桃李成蹊手自栽  
尊酒幾時邀客去園林無日不花開  
丹青一一歸圖畫紅紫紛紛費剪裁  
勝槩須公與題品杖藜何惜醉中來

自解

投綬歸來歲月過清閑殊勝吏分窠  
人思狡兔藏三窟我願白鷗同一波  
碁局何妨爛樵斧印章終欲博漁蓑  
人間萬事俱塵土醉倒尊前奈我何

陪諸友登三山亭

半濠清淺芰荷彫落日登臨未寂寥  
山色逼秋渾作市海聲迎暮欲吞潮  
沙頭白鳥疑相熟木末青旗苦見招



不似常時對官府可無閑話及漁樵  
霜林餘葉未全彫極目西風對沉寥萬里沙荒秋後草  
三神山動晚來潮移尊正及兵廚迤結客何須驛騎招  
老素撫床端可必未甘隨分隱耕樵

秋郊

秋水四五尺暮山三兩峯浮雲白毫相落日紫金穴  
笠前村笛樓臺古寺鐘殷勤小平遠圖畫記渠濃

次劉元直韻二首

秋來何事憶歸頻正以家無如婦津未許桂枝招隱士  
不妨挑葉贈行人夢魂歷歷千山遠客宦悠悠五斗貧  
犀著鸞刀許何日歸來舉案得紛綸

半年歸夢別離間只有音書鴈足還羅幕翠橫秋掩冉  
玉壺紅濕淚瀾班天明不作霧非霧月破可憐山復山  
准擬春風對眉臙一尊相對洗愁顏

次韻夜雨

海山何處是蓬瀛節物催人意自驚客裏厭逢今舊雨  
夢餘愁聽短長更故園頗覺歸期緩老境難堪此段清  
想得詩成正蕭瑟竹窓燈火夜微明

代人憶舊

緩步素絲障微吟紫綺裘醉便風側帽歌愛月明樓  
犀軸題春恨銅荷滴夜愁風流十年夢燈火漫揚州

梅



誰道江梅驛信遲，碧琅玕裏見橫枝。為尋疎影暗香處，  
獨立嫩寒清曉時。嚼蘂不妨浮白飲，認桃休賦比紅詩。  
平生東閣風流在，何遜而今鬢欲絲。

題雪浦人歸圖

亂目寶花雨過眉，斑竹筇笻音迎盡。鷓鴣喜態動烏龍水，  
鏡千江月風琴萬壑松。遙知永今夕，情話得從容。

歸來圖戲作

雲髻春風一尺高，笑携兒女候歸橈。情知一首閑情賦，  
合為微官懶折腰。

城南庵

故鄉歸思白雲邊，餅鉢東來想浩然。桑下久無三宿戀，

室中今許一燈傳。夢驚城郭風塵窟，興寄湖山雪月舡。  
老矣重游恐難得，平生四海與彌天。

書何維禎見贈詩後

塵埃握手衆人中，草木從來臭味同。春夏我雖迷出處，  
交游君不異初終。赤黃晚歲微竒夢，清白平生繼古風。  
嘆息蜀州人日作，傷心不覺涕無從。

寄題薊丘僧房

道人休去白雲邊，老矣分明懶瓚然。參學誰能知許事，  
退休聊得息諸緣。忘形馬跡車塵外，適意山光水影前。  
想得松根憇寂寞，壞殘雲衲半垂肩。

虛春亭



碧琅玕裏小蘆廬想像幽人手植初不獨禪心破諸有  
還於法性識真如古宿有翠竹真如之句應緣任笑風月底出世  
要觀霜雪餘他日升堂象玉版會須傍出賞春蔬

雨後

塵埃日日厭風霾一雨方容眼界開水底天光大圓鏡  
樹頭山色小飛來馬牛涉地無相及鷗鷺知人已不猜  
更得扁舟待明月一盃容我醉雲壘

題歸去來圖

筆端奇處發天藏事遠懷人涕泗滂餘子風流空魏晉  
上人談笑自羲皇折腰五斗幾錢直去國十年三徑荒  
安得一堂重寫照為公桂酒馮蕉黃

過關渡水圖

短車無復駕青牛散策方來對白鷗煙水從容許君獨  
暫須分我一舡秋

寄題孔德通東園

花木陰陰一畝宮平生高興與誰同尊壘北海無虛日  
鄉里東家有故風先業固知衣鉢在大門何惜橐囊空  
襄陽耆舊今誰識尚喜風流見阿戎

次韻鄴元與贈于元直道舊

人物傷心萬馬空于今聲價欻然東教條不獨行千里  
籌策曾經奉一戎事契百年知有自笑談三語記無同  
白頭賴有髯叅在解說當時喜怒公



倦游方嘆錦囊空此道誰知一夕東客裏簿書慚老子  
詩中旗鼓避元戎叩門莫厭經過數促席聊容語笑同  
此樂祇憂兒輩覺不應品藻待渠公

彥美生朝

壯日里閭俠臂彎雙角弓繡鞵金匱匣貂袖紫蒙茸雲  
態自蒼狗玉輝猶白虹為君占壽骨詩句有清風

張萱戲嬰圖

犀顛玉頰寧馨子霧鬢雲鬢窈窕娘三十年前大門日  
憶觀群戲碧方床

河橋

桃李香中八九家青旗高挂綠楊斜晚來風色渡頭急

滿地蕭蕭揚白花

昌邑道中

屋角雞號夜向晨客床相對話悲辛流離僅脫噲等伍  
老大空為濟上人却掃欲安無事貴累人猶屬有錐貧  
故山鄰里今安否歸去同尋笋簾春

題仲山枝巢

鏡中青鬢雪霜皤歲月從教落魄過物理不容人太過  
生涯休嘆我無多百年竟似蠅鑽紙萬事終同鼠飲河  
祇恐徐公宿緣在東風時夢海棠窠

許內翰安仁

安仁字子靖河間樂壽人大定七年進士歷禮部員外



郎出守澤州遷同知河南府事以汾陽軍節度使致仕  
子古字道真父子俱名流也

望少室

名山都不見真形萬仞盤盤入杳冥安得雲間騎白鶴  
下看三十六峯青

送二道者歸汾州

介休山下兩閑人來訪汾陽舊使君明日却歸塵外去  
一雙白鶴上青雲

草木蟲魚詠二首

蠅鑽故紙竟不悟蛾撲明燈甘喪生大似盲人騎瞎馬  
不知平地有深坑

蓬在府中應自直蒿生松下亦能高不關若輩工攀附  
物理由來繫所遭

少室道中

少室峯頭曉月沉千家城郭淡陰陰五更鷄唱殘星滅  
馬上看山過少林

遊泰安竹林

蕭寺天教勝處安峰巒騰擲水雲閑客來總說遊山好  
不道山僧却厭山

承旨党公

公諱懷英字世傑宋太尉進之十一代孫父純睦自馮  
翊來以從仕郎為泰安軍錄事參軍卒官妻子不能歸



遂為奉符人公之在孕也太夫人夢道士吳筠來託宿  
及公生儀觀秀整如神仙然少穎悟日授千餘言師毫  
社劉崑差濟南辛幼安其同舍生也嘗試東府取解魁  
是後困於名場遂不以世務嬰懷放浪山水間詩酒自  
娛簞瓢屢空晏如也夫人石氏徂徠先生之後亦能安  
貧守分既久鄉豪傑有知公者稍料理之大定十年擢  
進士甲科調成陽軍事判官汝陰令入為史館編脩應  
奉翰林學士出為太定軍節度使為政寬簡不言而人  
化召為翰林學士承旨致仕大安三年九月年七十八  
終於家是夕有大星殞於所居之堂眾驚視之而公已  
逝矣謚曰文獻禮部開闢公墓誌云公之文似歐公不

為尖新奇險之語詩似陶謝奄有魏晉篆籀入神李陽  
冰之後一人而已嘗謂唐人韓蔡不通字學八分自篆  
籀中來故公書上軋鍾蔡其下不論也小楷如虞褚亦  
當為中朝第一書法以魯公為正柳誠懸以下不論也  
古人名一藝而公獨兼之可謂全矣皇叔永臨伏誅公  
作詔云天下一家  
詎可窺於神器公族三有卒莫進於常刑非睦本根骨  
肉之情蓋為宗社安危之計亦由於德有失睦親乃於  
間歲之中連致逆謀之起思以義掩此於重典之坐行  
天高聽早殆匪此心之得已興言及此慨嘆矣庸論者  
謂公之制誥百年以來亦當為第一  
開闢公之作碑偶不及此故表出之

穆陵道中二首

沂山一何高群峰鬱孱顏我行間遺老云此小太山望  
秩有常祀其神號東安草荒穆妃墳雨剝漢武壇神仙



果何在可想不可攀千年等一昔俯仰悲人寰東望蓬萊宮咫尺滄波間

重山復峻嶺溪路宛盤盤流水滑無聲暗瀉溪石間岸草淒以碧鮮葩耀紅丹高雲映朝日流景青林端我行屬朱夏欲渴不得閑山中有佳人風生松桂寒

瓊花木后土像

皇媧化萬象賦受無竒偏胡為墮愛境亦為尤物萃煌煌靈祠花玉蕊冠春妍婉如傾國姝獨立江湖邊顧惜怨奪移含秀梁宮煙青黃竟自寇始信擁腫全珍材歸好事肌理緻且堅琢刻方寸餘遺像規汾壩願言稅靈取要復安所伶神游妙難詰豈以大小懸槐根開夢國

橘實泚基仙靜想寶龕中坐納東南天况有大者存指顧超八埏

君錫生子四月八日 左君錫前北名士

堂前種萱憂可忘不如生兒喜殊常嘔啞啼笑彩衣側滿堂和氣生嘉祥宴寢香凝佳夢兆與佛同生佛親抱我來初見出錦綉肌肉照人眉宇好世間兒子空紛紛如君此兒真慰人薊山東盤出英秀政與德門宜子孫天馬駒海鶴子氣骨初成便超異籟雲冲霄從此始

立春

水結東溪凍未漪風凌枯木怒猶威不知春力來多少便有青蠅負煖飛



端午日照道中

幾年客舍逢端午今日東行復海隅三歲已無平老艾  
一盃聊作辟愁符

夏日道出天封寺

疊澗重岡掩復開鳥啼人寂路縈回微涼暫逐行雲過  
細雨俄從遠樹來世事自嗟吾老矣山僧那識興悠哉  
婆娑十畝溪邊撥借汝清陰感不材

龍池春興

三十餘年惜別心重來獨興此登臨佳人何在暮雲昏  
游子不歸春草深曲檻凭欄花幕幕扁舟繫岸柳陰陰  
避人白鳥忽驚去雙影飛翻明翠岑

宿宣灣

清潁去無極悠悠楚甸深人家半臨水村徑曲穿林積  
雨猶行潦荒煙易夕陰夜涼淮浦月寂寞照邊心

黃彌守畫吳江新霽圖

江雲卷宿雨江風散晨煙山光煙雨潤欲滴影隨江水  
空明間修蛾新粧翠連娟下拂塵鏡窺明蠲漁舟來何  
許觸破青茫然中流水肥魚逆上受網應有松鱸鮮借  
問張季鷹西風幾時還漁郎理網喚不應但見水碧江  
涵天如何塵埃中眼界有許寬道人肯次陂萬頃為寫  
此境清而妍蒼崖無塵樹影寒直欲坐我苔磯邊我家  
竹溪陰小艇橫清漣異時赤脚踏兩舷不應尚作披圖



看

雪中四首

詩人固多貧深居隱茅蓬一夕忽富貴獨臥瓊瑤宮  
破窓明虛開門雪迷空蕭然視四壁還與嚮也同閉門  
撚須坐愈覺生理窮天公巧相幻要我森窮通衝寒起  
沽酒一洗芥蒂習

翻翻雪中鴉飛鳴覓遺粟雪深不可求  
我如鴟鷂多儲有餘肉我亦生理拙凍卧僵雪屋日午  
既無煙飢吟攪空腹豈不知屠沽肥甘隨取足幸待春  
雪消吾猶多杞菊

歲晏苦風雪曠野寒崢嶸濕新燒枯棘距刺相爭撐濃  
煙久伊鬱微焰方晶煖津津膏乳漲中有蚯蚓鳴蓬蒿  
掇快炬倏作脂灰輕餘暖未及愜睫浹先已盈卓有鄰  
家酒時澆肌粟平

歲晏雪乃畏農夫倍欣然不作祁寒怨應知有豐年笑  
我寄一室歸耕無寸田無田吾不憂飲喙當問天我者  
多田翁租賦常逋懸佞頭負呵責顏色慘可憐不如拾  
滯穗行歌兩無牽

雪

寶花天雨曉紛紛佛界粧嚴盡白銀待膺風雲初接勢  
犯寒糟麴若為神園中芳草誰能賦江上梅花獨自春  
半臂騎驢得佳句九原誰喚灑陵人



蟬

槁壤陰潛罷轉丸飄飄便作飲風仙幽藂何處拳枯蛻  
別樹還來續斷絃小院日長清夢覺空庭人靜綠陰圓  
無情物化誰能料觸撥羈懷一慨然

漁村詩話圖

江村清境皆畫本畫裏更傳詩語工漁父自醒還自醉  
不知身在畫圖中

晚雲次子端韻

灤溪經雨浪生花曉碧翻光漾晚霞川上風煙無定態  
盡供新意與詩家

送高智叔歸齊南

已作西溪約還為汶上行漂流知分際會合見平生旅  
枕勞歸夢家山入去程空齋桃李月寂寞照清明

日照道中

路轉清溪樹蔚然解鞍坐渴午陰圓避人鷗鳥驚飛盡  
時有游魚弄柳綿

夜發蔡口

落霞墮秋水浮光照舡明孤程發晚泊倦楫搖天星藹  
藹野煙合脩脩水風生遠浦浩渺漭微波澹彭觥嘒鳥  
有時起幽蟲亦宵征懷役嘆獨邁感物傷旅情夜久月  
窺席忼慨心未平

西湖晚菊



重湖匯城曲佳菊被水涯高寒逼素秋無人自芳菲  
鮮颺散幽馥晴露墮餘滋蹊荒綠苔合采采歎後時古瓶  
貯清泚芳樽湔塵霏遠懷淵明賢獨往誰與期徘徊東  
籬月歲晏有餘悲

西湖芙蓉

林颺振危柯野露委荒蔓孤芳為誰妍一笑聊自獻明  
粧炫朝颺醉態羞晚困脉脉懷春情悄悄驚秋怨豈無  
桃李媒不嫁惜嬋媛悠哉清霜暮共抱蘭菊恨

浪溪別吳安雅浪音郎

浪水清且白頻年照行役褰裳涉微波微波去無極悠  
悠溪上山送我往復還與君臨水別幽恨寄山間

奉使行高郵道中二首

野雪來無際風搖岸轉迷潮吞淮澤小雲抱楚天低蹙  
踏舡鳴浪聯翻路牽泥林鳥亦驚起夜半傍人啼  
細雪吹仍急凝雲凍未開牽閑時掠水帆飽不依梳岸  
引枯蒲去天將遠樹來行舟避龍節處處隱漁隈

孤鴈集句

萬里銜蘆至寒空半有無蹤分沙岸靜聲入塞垣孤影  
早衝關月飛高望海隅不知天外侶何處下平蕪

黃菊集句

九月欲將盡鮮鮮金作堆遠籬殘豔密擁臯細香來五  
色中偏貴群花落始開可伶陶靖節共此一傾盃



金山

我從渡淮涉高郵雪風連日吹行舟維揚地西闔夜色  
星月隱見邊城樓晴光破曉射瓜步照耀玉宇開瓊洲  
馮夷收威浪妥帖容我一到金山頭金山勝概冠吳楚  
萬礎礧峙江中流平生夢寐不到處乃以王事從私游  
鍾山雨花落眼底海門鶴崖波際浮川開林闔望不極  
但見遠色明輕鷗風煙渺漭異吾土行役有程難久留  
一盃未舉帆影轉已看浙樹稍旗旒

趙飛燕寫真

昭陽宮裏千蛾眉中有一人輕欲飛娉妹宜綠特新寵  
六宮鉛粉無光輝春回太液花如繡花底輕風扶翠袖

君恩不許作飛仙  
璧璫宮裙留淺皺  
君王貪宴溫柔鄉  
木門不省搖倉琅  
避風臺成畧今古  
空使遺妬驚霓裳  
當年傾城復傾國  
誰寫餘妍入丹碧  
背燈擁髻一潸然  
不應尚有樊通德

村齋遣事

人生天地真蘆蘆外物擾擾吾何須  
與其羈馬齊鞍駒豈若飲斲隨駘駘  
鴛鴦不知掉尾忘江湖  
响响馮沐胡為乎誰念挾卷矜村墟  
磨丹點黝園樵蕪申鞭示筆嚴  
範摸矍如狙翁調衆狙爾雅細碎編蟲  
命嚴義密字見疎  
洪齋睥睨音語麤  
諷誦誰敢忘須臾萬中有一差  
錙銖伊亞坐使為呻呼  
出哉倡言口聶需等為鬼戲夫何殊



霜風入戶寒割膚生新槎芽供燎爐漫漫濕煙迷四隅  
白鶴日見黔如烏此間縱樂能何如其誰相與歌歸歎  
夜籠嗟我自摯拘岳更待窮年徂

和張德遠代招之什

社稷賦散材乃遭匠石當高梧中宮徵不能保孫枝全  
傷隨用否理固不可移堂堂十八公端勁出天姿蟠根  
借餘潤茂鬱清溪涓雨師夜失律偶此遺神螭煙鱗漬  
寒雨霧鬣明朝曦騰拏困愈壯偃蹇僵不疲未能走沆  
漭聊與草木嬉長風動頭角吟嘯舒鬱伊塵埃詐能久  
雷電會有時昨宵月溪月老影閑橫款天明竟不舉俯  
仰益怪竒峯拳拳半崖渴喙吞清漪希珍價不售復病  
樵柯危材高輒爾耳咄彼造化兒膠枝飽霜雪遽與蓬  
蒿衰孤標挽萬牛未為廊廟知窈窕苑李春柰爾千歲  
期枯桑豈自賈取敗以老龜茲非爨下材梁棟終見施  
長短歸自然勿為鳧鶴悲

題獐猿圖

雲山空岡阜重榭葉半濕新霜紅溪猿得意適其適閑  
攀靜桂晴光中孤鷹何從來寂歷野竹風舉頭相視不  
相測昂藏却立如癡童鯤鵬負雲天斥鷃處蒿蓬萬生  
所樂自不同惘然胡為之二蟲

和濟倅劉公傷秋

川流為瀦鉅野闊水色天容兩開豁山隨水遠勢奔騰



駿馬西來銜轡脫山前雲木散不收坐看木末來歸舟  
秋容澄明納萬象盡本寂默橫雙眸謫仙曾來釣煙磧  
想見夕陽寒影隻騎驂去作汗漫遊只有荒臺壓澄碧  
臺邊昨夜西風來倦游羈宦心悠哉豈無瓊艘百拖載  
春色是中可以忘形骸官居得秋况不惡高吟何遽悲  
搖落君不見中郎詩翰憶湖山秋色正蒲連雲閣

題春雲出谷圖

春雲乍出山有無春雲已去春山孤山光空濛不可寫  
正要雲氣相縈紆山吞雲吐變明晦半與嵩谷生朝脯  
輕林蕭蕭暗溪樹餘影漠漠開樵居舟人艤掉並沙尾  
坐看縹緲搖空虛巧分天趣出畫外韻遠不與丹青俱

今人重古不知畫但愛屋漏煙煤汗惜我東坡不及見  
此本詩中獨有疊嶂煙江圖

輕林蕭蕭一作輕陰霏霏

新泰縣環翠亭

官居坐官府不見青山青閑來亭上看青山遶重城左  
見青山縱右見青山橫具教浮虛碧崢嶸群峯連娟相  
繚繞縣庭無事苔鮮生獨携珍琴寫溪聲琴聲鏘鏘激  
虛亭羅琴舉酒招山英山英莫相嘲我雖朝市如林垆  
客有山中來聞說令尹清山英異時合有情周遮不放  
公馬行

喜雨

山雲駁如驅山雨沛如傾幽人夢初醒卧聽簷溜聲雷



霆怒相搏似與陰陽爭蛟龍久何蟠始此幽蟄驚餘花  
曉猶落竟日方破晴明朝東臯望照眼生意明焦枯被  
沾濡相與迴春榮忻然野桃李新綠棲殘英漸漸麥堆  
翠溜溜溪流清蛙鳥亦解喜飛沉玄喧鳴萬物皆得時  
棲蓬感吾生直應挂儒冠便逐春農耕

睡覺門外月色如晝霜風過瑟然成聲作絕  
老木經霜衆竅空月明深夜響秋風始知天籟非人籟  
吹萬由來果不同

題張維中華山圖

苾珠散遺甯我姓出馮翊空聞華山名未始見顏色三  
峯擢觚稜經眼但石刻那知玉井蓮香落清渭北巔崖

劃變轉勢走關輔窄豈無愛山人不解傳粉墨多才曲江  
喬公暇日招揖歸裝貯新圖尚帶煙霧濕明窓一傳玩  
悅若到鄉國我生隨宦遊久作東南客有田太山下統  
屋皆泉石懷思戀官廩老大歸未得况復秦川遙便恐  
此生隔峻嶒蒼煙面只許畫中識詩成持送君想像三  
嘆息

題馬賁畫鴻鵠圖

雙眠雙浴水平溪共看秋光卧兩堤誰信瀟湘有孤鴈  
冷沙寒葦不成棲

書因叔北軒壁

生涯自分老林泉欲止還行信有緣未許綸竿歸醉手



且教煙水入吟鞭，雲山聊欲追。聲叟風腋何妨借，玉川獨卧北軒元。不寐竹間寒雨夜，琅然。

和元卿郊行

馬駸車驅起路塵，傍山陰翳翳作春温。東風欲放萌芽動，已有疲牛噉燒痕。

世華將有登州之行，作是詩以送之

少陵兄弟蓋三人，坡老相知只卯君。五畝有期將共隱，一樽何意便輕分。秋鴻渺渺看孤往，夜雨蕭蕭忍獨聞。侂日書來問無恙，我應深釣竹溪雲。

維密道中懷古

十二金齊勢興亡，俯仰中地傾。維水北山斷，穆陵東破

塚餘殘甃荒蹊足，轉蓬燕齊舊懸隔。不接馬牛風

過棠梨溝

地僻人煙少，山深澗谷重。坡陀下長坂，迤邐失諸峯。問俗知懷土，聽歌識相春。幾家茆屋外，田畝自衡從。

响山驛亭阻雨

東海地名蒼梧，舊說云此島自蒼梧浮來，又州有景疎樓。

脫葉蕭蕭山木稠，連檣飄汎海蓬秋。浪回响島馮夷舞，雲暗蒼梧帝子愁。欲往未行淹僕馬，乍來還去羨鷓鴣。景疎樓下無邊水，暫濯塵纓可自由。

弔石曼卿曼卿嘗通守响山，遣人以泥封桃

李核，彈之崑石中，其後花開滿山，又嘗携

妓飲山之石室，間鳴絃為水車鐵馬聲。



城頭山色翠玲瓏尚憶清狂四飲翁鐵馬水車斷遺響  
桃花石室自春風平生詩價千鈞重身後仙遊一夢空  
想見蓬萊水清淺芙蓉城闕五雲中

响山道中 三首

二年三到水雲鄉瘦馬凌兢怯路長野雪未乾春未雨  
落鳶飛起暗塵黃

吳歌楚語海山間織葦苦孤便自安已作稻塍猶未種  
小溝流澁水車乾

海路東南萬壑傾青山孤起壓重城驛亭春半餘寒雪  
墻角無人草自生

應制粉紅雙頭牡丹 二首

卿雲分瑞兩嫣然鏡裏粧成穀雨天  
曉日倚欄閑妬艷春風拾翠兩駢看  
水南水北何曾見桃葉桃根本自仙  
夢想沉香亭北檻畧脩花譜記芳妍  
春意應嫌芍藥遲一枝分秀伴雙鞋  
並眉翠袖初酣酒對鏡紅粧欲闔  
竒上苑風煙工戲巧中天雨露本無私  
更看散作人間瑞萬里黃雲麥兩岐

次文孺韻

病眼花生紙羈懷棘逸墻挑燈簷溜急到枕漏聲長響  
徹鷄埒曙寒迎鴈背霜淒涼三徑菊無夢到壺觴

詩是貢院中唱和故有花生紙棘逸竒之句

白莊道中



暖風遲日弄春晴  
渾似龍眠畫裏行  
沙路半隨堤尾曲  
幾家桃李鶯鷓鳴

花品

翠裙襞積破黃薇  
新樣丁香結玉蕤  
最愛東風木芍藥  
淡紅深紫兩相宜

上皇書扇後

便面團圓字點鴉  
天風吹墮委塵沙  
燕泥庭草爭工拙  
何似當年陌上花

送崔深道東歸

君從鬱菴幾時來  
鬱葱山色空崔嵬  
白雲已自動歸意  
蟪蛄蚺城况可懷  
薰風濁酒非苒苒  
那知空齋響蚊雷

酒酣臨風解相憶  
喚取玉笛傳清哀

和道彥至

山光凝黛水浮空  
地僻偏宜叔夜慵  
尚喜年登更冬暖  
敢論人厄與天窮  
君方有志三重浪  
我已無心萬里風  
擬葺小園師老圃  
綠畦春溜引連筒

楚清之畫樂天小娃撐小艇  
偷採白蓮回不

解藏蹤跡浮萍一道開  
詩因題其後

樂天歸卧湖山邊  
閑買池塘娛暮年  
小蠻已老樊素去  
心地玲瓏如白蓮  
室中誰遣散花天  
故點禪衣香破禪  
鴛鴦為報竊花處  
題詩要戲小嬋娟  
紅粧秋水照明蠟  
清之粉本清且妍  
道人無心被花惱  
對畫作詩真適然



君不見元亮按名蓮社裏不妨更賦閑情篇

寄賈因叔

鵝居穀食兩迷陽四十猶貪桂子香石汶為君拋水月  
憲陵回首見冰霜虫魚細碎成書癖荆棘崢嶸失醉鄉  
舉白北軒真一夢竹間猶記雨浪浪

題大理評事王元老雙橘堂

朱橘復朱橘傳分包貢寶煌煌中堂榜奇畫照公堂前  
萱草碧公今致養豐祿食更取蠻玕奉顏色舉觴一笑  
三千秋坐看諸孫索梨栗

宿舊縣四更而歸道中據所見作行路難

三星排空山月明思歸客子夜半行單衣短褐風凜清

響踏黃葉搏禽驚忽忽曉轉沙岸側枯蓼寒蘆鳴素率  
山月欲隨山煙黑前途無人脚無力行路難堪嘆息

途中壬辰正月

平明發郊墟獨步踰蹊蹠引領發前程日出煙未滅林  
迴鳥始喧麥短牛已噤春陽氣未壯道左尚殘雪長風  
拂歸袂凜欲變冬冽指凍僵不拳膠疑仍欲折而我竟  
何事犯此寒正切脩途去未幾行意先已芥安得兩翼  
生高飛度林樾

徐茂宗蝸舍

萬生擾擾安其安鸞鳩不羨鵬飛搏端知扶搖上九萬  
無異跳躍蓬蒿間是身江海一漂粟身外紛然皆外物



一塵儻可容所寓何用渠渠作高屋知君從道由心成  
昔焉忘俗今忘形物來弭角不知競觸蠻血戰良虛名  
我夢敲門訪君舍舍小不容相對話覺來驚見壁間蝸  
俯仰人間真物化

壬辰二月六日夜夢作一絕句其詞曰矯冗  
連天花春風動光華人眠不知眠我佩絳紅  
霞夢中自以為奇絕覺而思之不能自曉故  
作是詩以紀之

夢中作詩真何詩夢中自謂清且奇覺來反覆深諷味  
字偏句異誠難知豈非夢語本真語無乃造物為予嬉  
君不見莊周古達士栩栩尚作蝴蝶飛我生開眼尚如

此况在合眼夫何疑

黃華王先生庭筠

庭筠字子端熊岳人父遵古字仲元正隆五年進士仕  
為翰林直學士才行兼備道陵所謂昔人君子者也子  
端早有重名大定十六年甲科文采風流照映一時歷  
州縣用薦者供奉翰林永安中為言事者所累謫鄭州  
幕官未幾復應奉稍遷脩撰卒官年四十七子端詩文  
有師法高出時輩之右字畫學米元章其得意處頗能  
似之墨竹始天機所到文湖州已下不論也平生愛天  
平黃華山水居相下十年自號黃華山主有集傳于世  
其歿也道陵有詩悼之其引云王遵古朕之故人也乃



子庭筠復以才選直禁林者首尾十年今茲云云丑堂  
東觀中無復斯人矣其家以遺文來上尋繹之久良用  
愴然詩不錄屏山故人外傳云子端出家子風流蕩藉  
冠冕一時為人眉目如畫美談笑俯仰可觀外視若簡  
貴人初不敢與接一見之後和氣津津溢於衡宇間又  
其折節下士如恐不及苟有可取極口稱道之故人人  
恨相見之晚也子萬慶字禧伯詩筆字畫俱有父風仕  
為行尚書省左右司郎中猶子明伯幼歲學書書家即  
稱賞之侗儻無機脅力絕人曾有詩云釣鰲公子鐵心  
肯與在三山碧海東千尺雲帆已高揭不知何日得秋  
風死於鄧州年未四十也

揚秘監下槽馬圖

龍眠悔畫馬政恐墮馬趣我今破是說試下弟一句道  
人三昧手游戲萬象具萬象初莫逃畢竟無所住譬如  
大圓鏡照物隨其遇少馬物四散影果在何處楊侯具  
此眼透脫向上路萬馬落人間蓋證龍眠誤

書西齋壁

世事雲千變浮生夢一場偶然携拄杖來此據胡床有  
雨夜更靜無風花自香出門多道路何處覓亡羊

八月十五日過泥河見鴈

家在孤雲落照間行人已上鴈門關憑君為報平安信  
才是雲中第一山



示趙彥和

四柳危亭坐晚陰  
殷勤鷄黍故人心  
兒孫滿眼田園樂  
花木成陰年歲深  
十畝蒼煙秋放鶴  
一簾涼月夜橫琴  
家山活計良如此  
歸興秋風已不禁

大安寺試院中寒食

東風日日漲黃沙  
供佛床頭始見花  
寒食清明好時節  
年年憔悴獨離家

獄中賦萱

沙麓百戰場  
烏鹵不敏樹  
况復幽園中  
萬古結愁霧  
守根不擇地  
於此生意具  
婆娑綠雲杪  
金鳳掣未去  
晚雨沾濡之  
向我泣如訴  
忘憂定漫說  
相對清淚雨

東坡長春如雅女及賦世伯颺所截趙昌畫梅花黃葵  
芙蓉山中賦萱凡九首予請開公共作一輔寫目題其  
後云柳州怨少愈深其辭愈緩得古詩之正其清新宛  
麗六朝辭人少及者東坡愛而學之強形似之工其  
怨則不能自揜也裳承首出於二家辭不足而意有餘  
王公翰無內追配古人而偶與之合遂為集中第一  
都柳出於雅坡以下替有騷人之余韻所謂生不並世  
俱名家者也

獄中見燕

笑我迂踈觸禍機  
嗟君底事入園扉  
落花吹濕東風雨  
何處茅簷不可飛

借樂亭

日暮西風吹竹枝  
天寒杖履獨來時  
門前流水清如鏡  
照我星星兩鬢絲



野堂二首

綠李黃梅繞屋疎秋眠不着鳥相呼  
雨聲偏向竹間好  
山色漸從煙際無  
雲自知歸鳥自還一堂足了一生閑  
門前剥豕定佳客  
簷外孱顏皆好山

韓陵道中

石頭犖确兩坡間不記秋來幾往還  
日暮寒驢鞭不動  
天教子細數前山

絕句

竹影和詩瘦梅花入夢香  
可憐今夜月不肯下西廂

孫氏午溝橋亭

閑來橋北行偶過橋南去  
寂寞獨歸時沙鷗晚無數

送士選山東外臺判官

秋天寥廓使星明光動山東七十城  
玉署文章厭閑冷  
繡衣風采試澄清人隨白鴈霜前到  
詩繞青山馬上成  
才力如君君未老只愁無地避功名

張禮部溪山真樂圖

悠悠春天雲想見平時閑  
朝遊溪橋畔暮宿山堂間  
澹然不知愁亦復忘所懼  
出山初無心既出還思山人間  
待霖雨欲歸良獨難  
山堂悵何許蕭蕭松桂寒

內鄉浙江張浮休窪尊為二兄賦

崑花覆我酒酒面照幽妍  
風如惜花影不肯生微連空



山悄無人花枝自留連懷人成獨醉日暮山蒼然

超化寺

隔竹微聞鍾磬音  
墻頭脩綠冷陰陰  
山迎初日花枝靚  
寺裏清潭塔影深  
吾道蕭條三已仕  
此行衰病獨登臨  
簡書催得忽忽去  
暗記風煙幾處尋

舍利塔

蒼山亭亭如覆盃  
佛塔東西屹相向  
林頭朝日射重簷  
黃金丹砂曄生光  
中華此塔第十五  
圖記所傳知不妄  
智惠薰成舍利羅  
夜半竒芒時一放  
想見當時阿育王  
麾叱神工鞭鬼匠  
雲車瘴海挽炎沙  
沙底黃腸三萬丈  
石排方面茂石段  
鐵錮瘦中腰鼓樣  
功夫精密葉長久

位置尊嚴氣高張  
地皮浮水膚寸許  
旱溢與之俱下上  
崑山歸山夏秋雨  
雨潦從衡歲相盪  
天龍固護夜叉守  
終劫不敢生波浪  
塔前樹秀老不死  
樹下水流多益壯  
拜初嘗一勺甘洗  
我三生煩惱障

夏日

西窓近事香如夢  
北客窮愁日抵年  
花影未斜猶睡外  
槐枝猶顫鵲飛邊

中秋

虛空流玉洗世界  
納冰壺明月幾時有  
清光何處無人  
心但秋物天下近  
庭梧好在黃華寺  
山空夜鶴孤

被責南歸至中山

丙申春



短轅長路兀呻吟行李遲遲日益南親老家貧官職重  
思多責薄淚痕深向人顏色渾相識着雨花枝半不禁  
回首舩接雲氣隔六年侍從小臣心

送子貞兄歸遼陽

青峭江邊玉數峯煙梳雨沐為誰容到時為向山靈道  
歸意如君一倍濃

采蓮曲

南北湖亭競采蓮吳娃嬌小得人憐臨行折得新荷葉  
却障斜陽入畫舡

秋郊

瘦馬踏晴沙微風度隄斜西風八九月疎樹兩三家寒

草留歸犢夕陽送去鴉隣村有新酒籬畔看黃花

憶涸川

極目江湖雨連陰甲子秋青燈十年夢白髮一扁舟

夏日

檀欒倒影硯波清注了黃庭譜鶴銘且喜過門無襍穢  
却憐沈壁有寧馨

劉賓客詩事  
字平聲

河陰道中二首

梨葉成陰杏子青榴花相映可憐生林深不見人家住  
道上唯聞打麥聲

微行入麥去斜斜才過深林又幾家一色生紅三十里  
山多少石榴花



禮部閑閑趙公秉文

秉文字周臣滏陽人閑閑其自號也幼穎悟讀書若夙習大定二十五年進士應奉翰林文字上書論宰相胥持國嘗罷宗室守貞可大用又言獄訟征伐國之大政自古未有君以為可大臣以為不可而可行者坐譏訕免官未幾起為同知奇嵐軍州事轉北京路轉運司度支判官承安五年冬十月陰晦連日宰相萬公入對上顧謂萬公曰卿昨言天日晦冥亦猶人君用人邪正不分若極有理趙秉文曩以言事降授聞其人有才藻工書翰又且敢言朕非棄不用以北邊軍興姑試之耳泰和二年改戶部主事翰林修撰出為寧遠州刺史二年

改平定州治化清靜所去人思之貞祐初中國仍歲被兵公建言時事可行者三一遷都二導河三封建朝廷略施行之四年除翰林侍講學士明年轉侍讀興定中拜禮部尚書兼侍讀同修國史知集賢院開興正月京師戒嚴時公已老日以時事為憂雖食息頃不能忘每聞一事可便民一士可擢用大則拜章小則為當路者言啟勤鄭重不能自己竟用是得疾薨年七十四自幼至老未嘗一日廢書且不觀著易叢說十卷中庸說一卷揚子發微一卷太玄箋贊六卷文中子類說一卷南華略釋一卷列子補注一卷刑集論語孟子解各一十卷資暇錄一十五卷所著文章號滏水集者前後三十卷



大槩公之文出於義理之學故長於辨折極所欲言而止不以繩墨自拘七言長詩筆勢縱放不拘一律律詩壯麗小詩精絕多以近體為之至五言大詩則沉鬱頓挫學院嗣宗真淳簡澹學陶淵明以它文較之或不近也字畫則有魏晉以來風調而草書尤警絕殆天機所到非學能至宣徽卿使河湟夏人多問公及王子端內翰起居狀朝廷因以公報聘其為四方所重如此論者謂公至誠樂易與人交不立崖岸主盟吾道將三十年未嘗以大名自居仕五朝官六卿自奉養如寒士不知富貴為何物蓋學道所得云

雜擬 三首

朱明變氣候大火向西流六龍整征轡倏忽夏已秋閭闔來悲風霜稜被九州豈不念時節歲律聿其周精衛填溟海木石安所投獨携羨門子高步登崑丘千秋長不老求謝區中囚

猗猗南山竹並生凡卉藪歲晏多霜雪見別蕭艾中我欲食鷓鴣千歲不一逢留之和律呂截作嶰谷筒一變為清商日暮來悲風清泉溉石根上有白雲封虛心抱靜節知音為誰容不如歸去來一竿釣清澧

白日淪西汜滄海無回波四時更代謝奈此逢暮何我欲制頽光惜無魯陽戈憑高望八荒眇眇迷山河驚風振江海山林無靜柯獸狂走四顧曠野迷絳羅西登廣



武山北顧望三河蓬蒿蔽極目人少虎狼多喟然發長  
嘆拊劍徒悲歌

花下墓

山前樹今人看花昔人墓昔人栽花待邀賓花開墓上  
人何處今年花盡復明年今人復為後人憐酒澆墓上  
喫不得留與飢鴉作寒食

劔王右丞獨步幽篁裏

獨坐幽林下談玄復觀易西日隱半峰返照林間石石  
上多古苔山花間紅碧花落人不知山空水流出

和淵明擬古五首

小智多自私大方乃無隅一毫納萬象萬象非卷舒日

月為我牖天地為我廬曲士窘拘囚一身無容居我夢  
登日觀青天入平蕪俯視但一氣二豪彼何如

昔日穆天子侈心窮八荒崑崙入馬蹄蘧廬視明堂王  
母為之謠白雲何茫茫馮高俯九州塊如螻蟻場歸來  
越河關萬家壓崧邱遂令學仙者聞風為激昂漢武千  
秋露淮南八公方至今瑤池宴空為後代傷

吾道無緇磷萬古常如茲柰何中智下謂彼不知時與  
世頗殊好譬彼澠與緇我欲質所從登高望九疑路逢  
古漁父長歌滄浪辭出門異所見退坐還自思當世固  
殊古古人不吾欺翩翩出林鳥日暮將何之倚筇送煇  
盡聊欲弦吾詩



西北有佳人樓上拊雲和一鼓別鶴操弄弄求凰歌絃  
聲幾欲絕哀響何其多昔為掌中珠今為路旁花壯年  
不再得華落將如何

張衡詠思玄屈平賦遠遊高情薄雲天意氣隘九州朝  
攀扶桑枝夕飲弱水流翻然不忍去無女哀高丘嚴霜  
下百草歲律聿其周蕭蘭共憔悴已矣吾何求

中秋

天風吹河漢明月懸清光清光不可掇流影入杯觴吸  
此風露魄洗我冰炭腸向來功名心一笑雪沃湯人生  
幾中秋彈指三萬場胡為置熱惱不使心清涼此心如  
秋月虛明洞八方此身萬化中太山一毫芒尚無物懷

我何者為彭殤推琴黃葉落矯首白雲翔解衣一盤礴  
清境墮渺茫

送雷希顏赴涇州錄事李君美治中公解南  
樓坐中作

嚴霜枯百草搖蕩鴻鵠心翩翩萬里翼隨雲落西南涇  
水東流不到燕送君落日孤雲邊聲名一日天下白還  
作南樓坐中客西州自古多豪英作者凜凜氣猶生太  
尉清風萬萬古不勞折筮筮此虜男兒生不功名死無  
益莫言簿領卑凡職君不見當時騁張一尉耳至今雙  
廟令人起

魯直烏絲欄黃庭



太清虛皇玉景經琅函瓊笈秘始清囊以雲錦金鈿  
四神守衛訶百靈中夜一氣存黃庭玄霜瓊膏灌子形  
方瞳綠髮魂魄寧上壽千秋下百齡天書夜降勅六丁  
控駕三素乘風冷鳳笙龍箎超冥冥揚旌抗旆燿飛星  
八威吐毒驅雷震擲火萬里流金鈴仙人拂石胡不聽  
笑視人世風中螢世間醉夢紛臃腫三尺調汝丹日螟  
有如尾閭泄滄溟一朝神離鳥飛併涪翁書法出蘭亭  
名書此經實自銘開卷恍然如酒醒養生新發庖丁研

同粹中師賦梅

寒梅雪中春高節自一奇人間無此花風月恐未宜不  
為愛冷豔不為惜幽姿愛此骨中香花餘嗅空枝影斜  
清淺處香度黃昏時可使飢無食不可無吾詩

游華山寄元裕之

我從秦川來遍歷終南游暮行華陰道清心明雙眸東  
風一夜橫作惡塵埃咫尺迷崑幽山神戲人亦薄相一  
盃未盡陰霾収但見兩崖巨壁挿劍戟流泉夾道鳴琳  
瑯希夷石室綠蘿合金仙鶴駕空悠悠石門劃斷一峰出  
婆娑石上為遲留上方可望不可到崖傾路絕令人愁  
十盤九折羊角上青柯平上得以休三峰壁立五千仞  
其下無址傍無儔巨靈仙掌在霄漢銀河飛下青雲頭  
或云奇勝在高頂脚力未易供冥搜蒼龍嶺瘦苔蘚滑  
嵌空石磴誰雕鏤每怜風自四山而下不見底惟聞松



聲萬壑寒飈颭捫參歷井到絕頂下視塵世區中囚酒  
酣蒼茫瞰無際塊視五岳芥九州南望漢中山碧玉簪  
亂抽况復秦宮與漢闕飄然聚散風中漚上有明星玉  
女之洞天二十八宿環且周又有千歲之玉蓮花開十  
丈藕如舟五躡不朽之長松流膏入地盤蛟虬采根食  
實可羽化方瞳綠髮三千秋時聞笙簫明月夜芝輶羽  
蓋來瀛洲乾坤不老青山色日月萬古無停軸君且為  
我挽回六龍轡我亦為君倒却黃河流終期汗漫遊八  
極乘風更覓元丹丘

和淵明飲酒九首

翩翩萬里鶴日暮將何之昏鴉擇所安笑汝不知時孔

席不暇暖此理吾不疑尚愧淵明翁濁酒時一持

貧賤豈不苦仰慕冥鴻飛富貴豈不樂乃有黃犬悲苦  
樂各異趣嗜好從所依我欲作九原獨與淵明歸挂冠  
不待年况此齒髮衰遙酌一盃酒毋冷寸心違

秋菊有至性霜松無俗姿采采黃金花笑拊蒼烟枝偶  
有盃中物成此一段奇白雲南山來出岫復何為醉卧  
東籬下聊脫人間羈

今日好天色清晨雪雲開東風如故人適我平生懷坐  
見南來燕孤雌與雄未暮歸主人堂梁間有雙栖巢傾  
覆其子又補新巢泥翩翩隨陽鴈幽貞苦難諧江湖偶  
相失咫尺雲路迷哀哀霜雪際獨向胡天回



鷺鳥閉籠中舉翮觸四隅騏驥駕益車踟躕困中途雖然遭識拔未免為人驅傍觀信美矣自愧良有餘不如兩無累還我田園居

千載淵明翁誰謂不知道謾賦責子詩調戲以娛老杜陵蓋自况亦豈恨枯槁壺觴清濁共適意無醜好歸來五柳宅守我不貪寶長嘯天地間獨立萬物表

幽居澹無事雅志了玄經眼花憎文字悠悠竟無成中夜起不寐披衣守寒更梅竹散清影素月流廣庭孤鶴闕逸響切切寒虫鳴附卷長嘆息慨慷惻中情

漢儒傳注學未為世所得秦火少完書豈免烏鳥惑後儒補罅漏聖道少開塞俗士喜持戈又一秦相國且共

歡一觴多言不如默

淵明非嗜酒愛此酒中真謂言忘憂物中有太古淳回首市朝中萬事牛毛新去年持使節悠悠過西秦宮闕隨飛烟衣冠化埃塵當時憑軾士慷慨嘆徒勤所以山林客樂與魚鳥親西登太華頂曠望長河津寄謝三峯雲聊欲濫吾巾誓將從此去笑謝當塗人

和韋蘓州秋齋獨宿

冷暈侵殘燭雨聲在深竹鷺鳥時一鳴寒枝不成宿

擬兵衛森畫戟

冠帶事朝謁清坐彈鳴琴以彼塵外趣遠我遺世心岸幘送歸鳥隱几見遙岑聊同靜者樂豈必居山林



寄王學士子端

寄語雪溪王處士年未多病復何如浮雲世態紛紛變  
秋草人情日日踈李白一杯人影月鄭虔三絕盡詩書  
情知不得文章力乞與黃華作隱居

上清宮二首

霜葉蕭蕭覆井欄朝元閣上玉箏寒千年遼鶴歸華表  
萬里宮車泣露盤日上霧塵迷碧瓦夜深月露洗荒壇  
斷碑膾炙人何在吏部而今不姓韓  
暇日登臨近吹臺夷門城下訪寒梅鰲頭他日幾人在  
尊酒而今一笑開秋潦滲餘村逕出夕春歇處野禽來  
醉歸扶路人爭看知是詩仙閬苑回

寄陳正叔

渺渺西風去翼輕長林楓葉動秋聲嵩丘竟秀客多可  
河洛交流思獨清廣武山川迷故壘成臯草木闕空城  
憑高一掬英雄淚寄與窮途阮步兵

寄裕之

以雨新晴散痺頑一軒涼思坐中間樹頭風寫無窮水  
天末雲移不定山宦味漸思生處樂人生難得老耒閑  
紫芝眉宇何時見誰與嵩山共往還

古瓶蟾梅

石冷銅腥苦未清瓦壺溫水照輕明土花暈碧龍紋澁  
燭淚痕踈鴈字橫未許功名歸鼎鼐且收風月入瓶罍



嬌黃喚醒朝陽夢，漢苑荒涼草棘生。鴈子疑作鴈字

暮春得寒字

九日聊偷一日閒，三分春事二分閒。鄉關夢裏人空老，風雨夜來花又殘。乍坼泥封糕酒熟，未開火禁粥餠寒。却思投劾歸田去，楊柳陰中把釣竿。

靈感寺

徒河岸北白蓮東，法鼓驚飛碣石鴻。塔上風烟高鳥路，山頭雲雨化人宮。松林礙日蜂房冷，石砌頽沙蟻穴空。欲盡休公揮麈樂，鬚絲羞對落花風。

五月牡丹應制

好事天工養露芽，陽和趁及六龍車。天香護日迎朱輦，

國色留春待翠華。穀雨曾霑青帝澤，薰風又卷赤城霞。金槃薦瑞休嗟晚，猶是人間第一花。

代州

金波曾醉鴈門州，端有人間六月秋。萬古河山雄朔部，四時風月入南樓。漢家戰伐雲千里，唐季英雄土一丘。繫馬朱欄重回首，烟波誰在釣魚舟。

開元寺

歲久開元寺，黃花落石龍。瓶深添碧甃，壁篆金容恣。影年年塔，禽棲夜夜鍾。平生睡秋雨，竹閣味偏濃。

謁北嶽

四大神儀一群山，太茂尊奠方荒奠。宅視禮配天孫西，



送虞淵暮東瞻碣石瞰宝符臨代郡鐵甕扼并門控趙  
襟形壯包燕氣象渾九河探禹跡萬里叫虞魂在昔登  
封始前驅羽衛繁千官駢部曲萬騎隘山樊卜地恒陽  
曲移祠泰始元晉移祠荒碑刊歲月飛石碣乾坤帝秩加  
黃屋宮居象紫垣雲楣朽芝瑞雨砌裂槐根天業恢弘  
大山靈翊衛屯巫閭歸帝製長白發金源九廟龍盤接  
三邦地勢吞雲烟浮近甸日月遶中原歛謁天香重封  
題御署存銀鏐諸產富雷雨萬靈奔神聽羞回德天聰  
納正言負時身九死去國淚雙痕日近趨天闕生還託  
聖恩許身徒稷契無術補羲軒帝籙長乘洞仙巖張果  
村卜居如可近重整北山轅

陪李舜咨登憫忠寺閣

日月纏雙拱風烟納寸眸雲山浮近甸宇宙有高樓鳥  
外餘殘照天邊更去舟登臨有如此况接李膺遊

廬州城下

月暈曉圍城風高夜斫營角声寒水動弓勢斷鴻驚利  
鏃穿吳甲長戈斷楚纓回看經戰處慘淡暮寒生

白鴈

波淨影逾白霜清鳴更哀乾坤雙鬢老風雪一聲未林  
迴隱猶見天長去復回物情嫌太潔莫使羽毛催

桃花島寄王伯直

冰破村橋擁春寒旅鴈低遠山封霧小高浪與雲齊島



寺明松雪潮舡濺藕泥詩情吟不盡寄與畫中題

郎山馬耳峯

房駟落人間入石露雙碧月明聞夜嘶驚落山頭石

春遊 三首

無數飛花送小舟蜻蜓款立釣絲頭一溪春水關何事  
皺作風前萬疊愁

樹藏脩竹竹藏門門外清流幾股分行過小橋人不見  
苔陰花氣隔牆聞

烟外絲絲風柳斜春光也自到天涯太平有象村村酒  
寒食無家處處花

暮歸

貪看孤鳥入重雲不覺青林雨氣昏行過斷橋沙路黑  
忽從電影得前村

清居寺五杉亭觀子野留題

五杉今日只三株曾是詩人嘆息餘君去我未杉尚在  
斷腸君歿見君書

雞鳴山

烟蒸山腹晴猶濕河帶冰斯暖漸流獨上雞鳴看日出  
五雲多處是皇州

盧溝

河分橋柱如瓜蔓路入都門似犬牙落日盧溝溝上柳  
送人幾度出京華



雨晴二首

東風時送瓦溝聲  
欹枕幽窗夢自驚  
睡起不知雲已散  
夕陽偏向柳梢明  
一抹平林媚夕暉  
山烟漠漠燕飛飛  
倚欄遙認天邊電  
何處行人帶雨歸

寓望

蒲根閣閣亂蛙鳴  
點水楊花半白青  
隔岸風未聞鼓吹  
柳陰深處有園亭

戴花

病未盃酒懶重持  
強爲花殘折一枝  
人老易悲花易落  
東風休近鬢邊吹

玉堂

玉堂陰合冷窻紗  
雨過銀泥引篆螭  
萱草莪葵俱不見  
蜂聲滿院採槐花

夏至

玉堂睡起苦思茶  
別院銅輪碾露芽  
紅日轉堦簾影薄  
一雙蝴蝶上葵花

華山

石頭磴确水縱橫  
過雨山間草履輕  
未到上方先滿意  
倚天青壁看雲生

雨晴

一春不雨漫塵黃  
碧瓦朝來泛霽光  
留得紫威花上露



幾招渴燕下雕梁

即事

樓頭不見暮山重  
遙認青林雨意濃  
一陣風來忽吹散  
斷雲還補兩三峯

同樂園

二首

春歸空苑不成研  
柳影毵毵水底天  
過却清明遊客少  
晚風吹動釣魚舡  
石作垣墻竹映門  
水回山複幾桃源  
毛飄水面知鴉柵  
角出墻頭認鹿園

繫舟山圖裕之

岩

先大夫嘗居此山之東

山頭佛屋五三間  
山勢相連石嶺關  
名字不經從我改  
便稱元子讀書山

虎牢

兩崖峽束枕洪濤  
自古英雄爭虎牢  
蒼天胡為設此險  
長使戰骨如山高

中州丙集卷終



合中水内  
五十六



程